

SIRI MENJELAJAH ALKITAB

KISAH RASUL-RASUL

DIBERI KUASA DARI ROH KUDUS UNTUK
MENJADI SAKSI SAMPAI KE HUJUNG BUMI



WAWASAN
PENABUR

Siri Menjelajah Alkitab

Kisah Rasul-Rasul

Penulis : Goh Kim Guat
Penterjemah : Veronica Molion
Penyunting : Randy Singkee
Reka Letak : Randy Singkee
Penelitian Pruf : Steffisley Mosingki & Jouslly Buaya
Kulit buku : Chiang Juat Chin

Cetakan Pertama: September 2013

Hakcipta © 2005 Edisi Bahasa Inggeris
Issachar Sdn Bhd

Hakcipta © 2012 Edisi Bahasa Malaysia
Wawasan Penabur Sdn. Bhd.

Petikan Alkitab diambil dari:
Alkitab Berita Baik, Edisi Kedua © 2001 The Bible Society of Malaysia

Diterbitkan oleh:
Wawasan Penabur Sdn. Bhd.
P.O.Box: 8327, Kelana Jaya
46787 Petaling Jaya, Selangor
wawasan.penabur@gmail.com

Wawasan Penabur bekerja rapat dengan gereja-gereja berbahasa Malaysia untuk mengembang, menerbit dan menyebarkan bahan-bahan sumber Kristian dalam Bahasa Malaysia yang berasaskan Alkitabiah bagi kegunaan gereja dan umat Tuhan. Diilhamkan oleh pemimpin-pemimpin Kristian lintas-denominasi, Wawasan Penabur adalah satu organisasi bukan untuk keuntungan yang komited untuk melayani umat Kristian berbahasa Malaysia di Malaysia.

Hak Cipta terpelihara.

Tidak dibenarkan mengeluar ulang mana-mana bahagian artikel, ilustrasi, dan isi kandungan buku ini dalam apa juga bentuk dan dengan cara apa juga sama ada secara elektronik, fotokopi, mekanik, rakaman atau cara lain sebelum mendapat izin bertulis daripada Penerbit.

Daftar Isi

1	Prakata
2	Sebelum Anda Bermula
3	Pengenalan
3	Pengenalan Kepada Kisah Rasul-Rasul
6	Tokoh-Tokoh Dalam Kisah Rasul-Rasul
13	Perjalanan Misi Rasul Paulus
20	Nota-Nota Geografi
25	Mukjizat-Mukjizat Dalam Kisah Rasul-Rasul
27	Khutbah-Khutbah Dalam Kisah Rasul-Rasul
28	Kesan Penganiayaan Selepas Kematian Stefanus
29	Latar Belakang Agama Dalam Perjanjian Baru
36	Latar Belakang Kebudayaan Dalam Perjanjian Baru
39	Kisah Rasul-Rasul
40	Bab 1
44	Bab 2
50	Bab 3
52	Bab 4
56	Bab 5
59	Bab 6
61	Bab 7
64	Bab 8
68	Bab 9
72	Bab 10
75	Bab 11
77	Bab 12
81	Bab 13
85	Bab 14
87	Bab 15
90	Bab 16
94	Bab 17
97	Bab 18
100	Bab 19
104	Bab 20
107	Bab 21
111	Bab 22
113	Bab 23
117	Bab 24
121	Bab 25
125	Bab 26
128	Bab 27
133	Bab 28
137	Senarai Rujukan

Prakata

Siri Menjelajah Alkitab merintis kepada satu komentari ringkas untuk buku-buku yang terdapat dalam Alkitab, khusus untuk para remaja dan belia yang mempunyai kerinduan untuk menghayati dan mempelajari Alkitab secara berseorangan ataupun berkumpulan. Siri ini diilhamkan oleh adanya keperluan bagi para pelajar Tingkatan 4 dan 5 (khususnya dari Sabah dan Sarawak) yang memilih dan mempersiapkan diri untuk mengambil mata pelajaran pilihan Bible Knowledge bagi peperiksaan Sijil Pelajaran Malaysia.

Ramai pelajar Kristian yang tidak sedar bahawa ada mata pelajaran yang dikenali sebagai Kertas 9221 Bible Knowledge, yang ditawarkan dalam peperiksaan SPM. Dengan rahmat Tuhan, mata pelajaran ini masih lagi bertahan sejak tahun 1960-an, walaupun telah beberapa kali cuba ditiadakan oleh Kementerian Pendidikan dengan alasan tidak mendapat sambutan daripada para pelajar.

Kertas 9221 Bible Knowledge adalah dalam Bahasa Inggeris. Sukatan pelajarannya merangkumi dua bahagian:

- (1) Kehidupan dan ajaran Yesus Kristus berdasarkan Injil Lukas, dan
- (2) Pertumbuhan Gereja Awal berdasarkan Kisah Rasul-Rasul.

Siri Menjelajah Alkitab ini akan menjadi panduan kepada mereka yang berhasrat untuk mengambil Bible Knowledge sebagai mata pelajaran pilihan SPM, atau bagi individu yang mahu mendalamai Firman Tuhan. Ada beberapa sebab mengapa kita harus menggalakkan para pelajar Kristian mengambil mata pelajaran pilihan Bible Knowledge, walaupun harus menjawabnya di dalam Bahasa Inggeris:

1. Pelajar-pelajar Kristian harus mengetahui Firman Tuhan sama seperti mereka memahami mata pelajaran akademik yang lain.
2. Mengambil mata pelajaran ini merupakan satu pelaburan masa untuk kekekalan.
3. Firman Tuhan adalah sauh yang diperlukan oleh para pelajar semasa melalui masa-masa sukar dalam hidup, khususnya dalam menghadapi cabaran ganggu-gugat iman yang mereka percaya.
4. Ia akan menjadi satu landasan keakhlakan dalam semua tindakan dan keputusan dalam kehidupan sehari-hari mereka.
5. Gereja di Malaysia memerlukan para pemimpin hari esok yang benar-benar takut akan Tuhan.
6. Ia juga akan membantu meningkatkan penguasaan para pelajar terhadap Bahasa Inggeris.

Bermula dengan Injil Lukas dan Kisah Rasul-Rasul, Siri Menjelajah Alkitab ini akan dikembangkan untuk meliputi buku-buku lain yang ada di dalam Alkitab.

Semoga angkatan pelapis Gereja di Malaysia akan dikuatkan dan diteguhkan iman mereka dalam menghadapi pelbagai cabaran yang mengganggu-gugat kepercayaan mereka di dalam ajaran dan keilahian Tuhan Yesus Kristus. Dan semoga para remaja dan belia kita akan lebih mengenal, mencintai dan meneladani Yesus Kristus yang adalah Jalan, Kebenaran dan Hidup. Amen!



Sebelum Anda Bermula

Sebelum anda memulakan penjelajahan anda dalam mengenal dan menghayati Kisah Rasul-Rasul, ada beberapa petunjuk yang akan membantu anda sepanjang pengembalaan anda:

1. Baca bahagian Pengenalan Kepada Kisah Rasul-Rasul terlebih dahulu.
2. Baca Kisah Rasul-Rasul paling kurang sekali sebelum anda memulakan pembelajaran dengan mendalam untuk setiap bab.
3. Nota-nota di bahagian bawah setiap halaman (bahagian Teropong) menyediakan beberapa maklumat latar belakang untuk membantu anda memahami Firman Tuhan yang dibaca.
4. Sepanjang penjelajahan anda, anda akan berhenti untuk berfikir sejenak Firman Tuhan yang telah dibaca, mengambil prinsip dan pengajaran untuk dijadikan pegangan dalam hidup, berdoa dan menghafal Firman Tuhan

Dalam buku ini, anda akan bertemu dengan simbol-simbol berikut:



Perkara-perkara menarik untuk diketahui - ini adalah nota-nota yang akan membantu anda memahami ayat atau petikan Alkitab tersebut



Sesuatu untuk difikirkan - ini adalah soalan-soalan yang akan membantu anda untuk membuat refleksi dan renungan, serta bagaimana kebenaran Firman Tuhan itu dapat di terapkan di dalam hidup anda.



Untuk pegangan hidup - ini adalah komentar-komentar yang boleh membantu anda dalam kehidupan sehari-harian anda dengan Tuhan.



Berhenti sejejak untuk berdoa - ini menunjukkan bahawa anda mungkin mahu berhenti sejenak untuk berdoa kepada Tuhan tentang apa yang anda telah baca dan pelajari. Ingatlah bahawa Roh Kuduslah guru anda yang terbaik.



Ayat Firman Tuhan yang menjadi pendorong kepada anda - ini adalah ayat-ayat Firman Tuhan untuk anda hafal dan simpan di dalam hati anda.



Pengenalan Kepada Kisah Rasul-Rasul

Penulis

Secara umum, adalah dipersetujui bahawa pengarang Injil Lukas juga merupakan pengarang buku Kisah Rasul-Rasul. Kedua-dua buku tersebut ditujukan kepada individu yang sama iaitu Teofilus. Bahasa dan struktur kedua-dua buku tersebut adalah sama dan menunjukkan bahawa kedua-duanya telah ditulis oleh orang yang sama. Adalah lazim bagi penulis di zaman dahulu untuk mengatur karya mereka kepada beberapa bahagian yang lebih pendek, yang dikenali sebagai 'kitab', serta membuat pengenalan ringkas bagi setiap bahagian itu. Kisah Rasul-Rasul merupakan bahagian kedua daripada kitab dua jilid, di mana bahagian pertama jilid tersebut adalah Injil Lukas.

Asalnya kedua-dua buku tersebut diedarkan bersama-sama sebagai satu karya lengkap yang mempunyai dua bahagian. Tetapi di akhir abad pertama atau awal abad kedua, bahagian pertama daripada jilid tersebut telah disatukan dengan Injil Matius, Markus, dan Yohanes bagi membentuk 4 kitab Injil tentang kehidupan Yesus Kristus. Jilid kedua kemudiannya diedarkan secara berasingan selepas itu. Pada masa inilah, bahagian kedua daripada jilid tersebut mendapat namanya sebagai "Kisah Rasul-Rasul". Perkataan "Kisah Rasul-Rasul" memaparkan penyebaran injil dan pekerjaan para rasul.

Walaupun penulis tidak menyatakan dirinya dalam karyanya, bukti di luar Kitab Suci serta pemerhatian dalam buku tersebut menyimpulkan bahawa penulis buku tersebut adalah Lukas.

a. **Bukti Luaran**

Bukti yang paling jelas didapati dari Ireneus (sekitar 180 M), salah seorang daripada uskup gereja awal, yang menamakan Lukas sebagai penulis Injil ketiga serta Kisah Rasul-Rasul. Sejak dari itu, tradisi telah mengekalkan Lukas sebagai penulisnya.

b. **Bukti Dalaman**

- Dalam penerangan peristiwa-peristiwa di dalam Kisah Rasul-Rasul, kata ganti nama "kita" digunakan dalam beberapa ayat, termasuk kisah penahanan Paulus di Roma. Pada bahagian-bahagian tersebut, penulis memasukkan dirinya sebagai teman Paulus dalam pengembarnya. Selepas mengenepikan semua teman perjalanan Paulus yang lain, yang atas sebab-sebab tertentu tidak menepati syarat untuk menjadi penulis Kisah Rasul-Rasul, Lukas merupakan calon penulis yang paling tepat.
- Walaupun penulis Kisah Rasul-Rasul tidak dapat dibuktikan sebagai seorang doktor melalui perbendaharaan kata dalam buku tersebut, perkataan-perkataan yang digunakannya serta pendidikannya banyak mencerminkan tugasnya sebagai seorang doktor. Dan Paulus menggunakan istilah "doktor" apabila menggambarkan Lukas (Kol 4: 14).

Lukas dilahirkan dalam sebuah keluarga bukan Yahudi, berpendidikan dalam budaya Yunani dan berprofesi sebagai seorang doktor (Kol 4:14). Dia mengembara bersama Paulus beberapa kali, besar kemungkinan menyertai Paulus di Troas dalam perjalanan misi keduanya. Dia tetap tinggal di Filipi apabila Paulus dan Silas berpisah. Tidak dinyatakan berapa lama Lukas tinggal di Filipi. Tetapi dia sepertinya menyertai Paulus semula dari Filipi untuk perjalanan misi Paulus yang terakhir. Dari Filipi, dia menemani Paulus ke Yerusalem. Dia ada bersama-sama dengan Paulus sewaktu Paulus ditahan di Kaisarea. Dia juga menemani Paulus sewaktu Paulus pertama kali dipenjarakan di Roma. Lukas adalah seorang sahabat yang setia yang tetap bersama dengan Paulus walaupun orang lain meninggalkannya (2 Tim 4: 11). Tradisi gereja awal mencadangkan bahawa Lukas mungkin berasal dari Antiochia di Siria atau dari Filipi di Makedonia.

Tempat dan Tarikh Buku Ditulis

Ada dua tarikh yang dikemukakan untuk penulisan buku ini: (i) sekitar tahun 63 M, sejurus selepas peristiwa terakhir yang direkodkan dalam buku tersebut, dan (ii) menjelang tahun 70 M atau selepasnya.

- Mereka yang menyokong tarikh yang lebih awal mempertikaikan bahawa buku tersebut tidak menyebut apa-apa tentang peristiwa yang berlaku selepas penahanan Paulus selama dua tahun di Roma. Contohnya pembakaran di Roma serta penganiayaan orang Kristian di Roma (64 M); kesyahidan Petrus dan Paulus (kemungkinan 70 M); dan keruntuhan kota Yerusalem (70 M). Mereka juga mengajukan soalan tentang mengapa Lukas tidak mencatat keputusan penghakiman Paulus sekiranya peristiwa itu telah berlaku ketika dia menulis Kisah Rasul-Rasul.



2. Mereka yang menyokong tarikh kedua mempertahankan bahawa salah satu tujuan Lukas untuk menulis sejarah telah dicatatkan di Kisah Rasul-Rasul 1:8 dan tujuan itu mempengaruhi bagaimana buku tersebut diakhiri. Dia ingin menunjukkan kisah bagaimana gereja berkembang dengan pesat di zamannya (Yerusalem, Yudea, Samaria dan ke hujung bumi) sehingga sampai ke Roma, pusat politik dan kebudayaan dunia. Dalam pemahaman ini, kematian Paulus (67 M) dan keruntuhan Yerusalem (70 M) adalah tidak relevan. Ini bermakna Kisah Rasul-Rasul mungkin ditulis pada 70 M atau kemudian. Beberapa orang mengusulkan bahawa Lukas bukan hanya menulis sejarah peristiwa tetapi dia juga telah mempertimbangkan kepentingan cerita yang ditulismu. Mereka mengatakan bahawa penulis tidak dapat melakukan hal tersebut melainkan dia berada jauh daripada peristiwa yang berlaku supaya dia boleh melihatnya dengan pandangan yang berbeza. Oleh itu, mereka mempertahankan pendapat bahawa Lukas menulis pada masa dia boleh mengingat kembali peristiwa yang diceritakannya.

Sekiranya tarikh penulisan tidak dapat ditetapkan, tempat buku itu ditulis lebih sukar untuk dipastikan. Tradisi mengaitkan Lukas dengan Antiokhia, walaupun terdapat saranan yang lain seperti Roma, Filipi atau Efesus.

Ketidakpastian tentang tarikh dan tempat serta situasi yang tepat ketika Kisah Rasul-Rasul ditulis tidak mengubah nilai dan kepentingan buku tersebut dan juga tujuan penulisannya. Tema utama Kisah Rasul-Rasul sangat jelas dan menonjol dalam seluruh buku tersebut.

Bahasa dan Gaya Bahasa

Lukas menulis buku ini dalam bahasa Yunani. Dia mempunyai pemahaman yang cemerlang dalam bahasa tersebut, ditambah dengan tatabahasa yang luas dan kaya. Bersama dengan penulis buku Ibrani, bahasa Yunaninya adalah salah satu yang paling halus dalam Perjanjian Baru, seperti yang dilihat dalam Injil Lukas. Walau bagaimanapun, tidak seperti penulisannya dalam Injil Lukas, Lukas menggunakan bahasa Yunani yang lebih kasar di beberapa bahagian Kisah Rasul-Rasul, yang gaya bahasanya sama dengan Perjanjian Lama dalam bahasa Yunani atau Septuagint (Perjanjian Lama yang ditulis dalam bahasa Yunani untuk orang Yahudi yang tidak bertutur dalam bahasa Ibrani). Mungkin Lukas menganggap dirinya sedang mencatatkan sejarah yang suci, mempercayai bahawa peristiwa-peristiwa yang dicatatnya itu menggenapi nubuatannubuatan dalam Perjanjian Lama dan merupakan satu pekerjaan Allah yang sedang berjalan.

Kepentingan Buku Kisah Rasul-Rasul

Nama "Kisah Rasul-Rasul" sebenarnya agak mengelirukan kerana kebanyakannya peristiwa tertumpu kepada Petrus dan Paulus serta orang-orang dan peristiwa-peristiwa yang berkaitan dengan pelayanan mereka, bukan kesemua dua belas orang rasul. Sekiranya kita tidak mempunyai buku Kisah Rasul-Rasul, kita tidak akan mengetahui gerakan Kristian awal kecuali sedikit maklumat yang diambil dari surat-surat Paulus atau penemuan melalui perkembangan-perkembangan yang selanjutnya.

Kisah Rasul-Rasul adalah buku Perjanjian Baru yang ketiga terpanjang, iaitu sepersepuluh lebih pendek daripada Lukas (buku terpanjang di Perjanjian Baru) dan hampir sama panjangnya dengan Injil Matius. Lukas dan Kisah Rasul-Rasul merangkumi kira-kira 30 peratus tulisan di dalam Perjanjian Baru. Buku Kisah Rasul-Rasul memberikan kesinambungan kepada tulisan-tulisan lain dalam Perjanjian Baru. Sebagai bahagian kedua kepada Injil Lukas, ia menyambungkan apa yang Yesus 'telah lakukan dan ajarkan' seperti yang dicatatkan dalam Injil dengan apa yang Dia terus lakukan dan ajarkan melalui khutbah para rasul dan penubuhan gereja awal.

Selain daripada menghubungkan cerita-cerita Injil dengan surat-surat para rasul, ia juga menjadi sumber maklumat bagi kehidupan Paulus di mana kita boleh menemui latar masa dan tempat bagi surat-suratnya. Secara geografi, ceritanya menjangkau kawasan di antara Yerusalem tempat di mana gereja bermula, dan Roma, pusat politik empayar tersebut. Dari sudut sejarah, ia menggambarkan 30 tahun pertama bagi gereja Tuhan Yesus.

Tema dan Tujuan

Lukas tidak memberitahu tujuannya menulis buku Kisah Rasul-Rasul dengan jelas. Ini kerana dia telah pun menyatakan tujuannya menulis buku dua jilid tersebut dalam Injil Lukas, jilid pertamanya.

Dia mengatakan dalam Lukas 1:4 bahawa dia menulis kepada seorang individu yang bernama Teofilus, nama yang bermaksud 'seseorang yang mengasihi Allah', supaya dia mengetahui dengan pasti setiap



pengajaran yang diterimanya. Teofilus mungkin merupakan seorang pegawai Roma atau seseorang yang kaya dan berkedudukan tinggi. Kemungkinan besar dia merupakan penaung Lukas, yang bertanggungjawab untuk memastikan supaya tulisan-tulisan Lukas dicetak dan diedarkan. Dia seperti seorang lelaki yang walaupun terbuka kepada Injil dan mungkin yakin dengan apa yang dinyatakannya, tetapi dia mempunyai banyak persoalan tentang ajaran Kristian yang diketahuinya. Melihat cara Lukas menulis kepadanya, kita dapat menyimpulkan bahawa Teofilus juga berminat tentang bagaimana injil disebarluaskan, diterima dan apakah keberhasilannya di pelbagai pusat pengaruh di kawasan timur empayar tersebut, dari Yerusalem ke Roma. Dalam Injil, Lukas mahu Teofilus untuk mula mengetahui apa yang Yesus telah ajarkan dan lakukan (Kis 1:1). Dalam Kisah Rasul-Rasul, dia mengaitkan apa yang diteruskan dan diajar oleh Yesus melalui pengikut-pengikut-Nya.

Beberapa tema utama yang terdapat dalam Kisah Rasul-Rasul ialah:

1. Satu Pengisyiharan Injil

Dalam jilid pertamanya, Lukas menunjukkan bagaimana lelaki dan wanita dihadapkan dengan Firman Allah sewaktu pelayanan Yesus di atas bumi. Dalam Kisah Rasul-Rasul, Lukas mahu menunjukkan bagaimana lelaki dan wanita terus dihadapkan dengan Firman yang sama melalui pelayanan gereja. Bagi Lukas, mesej keselamatan dalam Yesus yang dinyatakan oleh gereja merupakan kesinambungan pelayanan dan ajaran Yesus secara tidak langsung. Khutbah dalam Kisah Rasul-Rasul mengandungi mesej tentang kebangkitan dan pengagungan Yesus.

Jalan cerita utama Kisah Rasul-Rasul adalah berkenaan dengan penghabaran mesej keselamatan ini. Salah satu tema utama di dalam Kisah Rasul-Rasul ialah misi. Ia merupakan misi para rasul serta jemaah awal Kristian untuk menyebarkan mesej bermula dari Yerusalem di kalangan orang Yahudi dan kemudiannya ‘ke hujung bumi’ untuk semua orang. Mesej tersebut akhirnya melepaskan diri dari batas di kalangan agama Yahudi dan mempengaruhi kehidupan ramai orang melalui kuasa dan pekerjaan Roh Kudus.

2. Permulaan Gereja

Kisah Rasul-Rasul memaparkan sejarah permulaan gereja Kristian yang terawal. Ia menceritakan penubuhan gereja, penyebaran injil, permulaan jemaah, dan usaha-usaha penginjilan dari jemaah Kristian awal.

Lukas juga bertujuan untuk menggambarkan kehidupan dan cara penyembahan gereja awal sebagai corak untuk dijadikan pedoman bagi gereja pada waktu itu serta gereja pada masa akan datang. Dia menekankan kepentingan Roh Kudus dalam kehidupan gereja.

3. Mempertahankan Iman

Dalam Kisah Rasul-Rasul, terdapat catatan yang menyatakan pembelaan Kristian untuk orang Yahudi (cth, 4:8-12) dan orang bukan Yahudi (cth, 17:22-31), dengan tujuan untuk mengisyiharkan iman. Lukas ingin memperlihatkan bahawa agama Kristian bukan ancaman kepada empayar tersebut, seperti yang didakwa oleh pihak Yahudi, tetapi ia lebih kepada kemuncak harapan Israel dan perlu dianggap oleh pihak berkuasa Roma sebagai satu *religio licita* (agama yang sah) sama seperti agama Yahudi. Lukas sangat berhati-hati dalam menunjukkan bahawa tidak ada seorang pun pegawai Roma dalam abad pertama yang pernah menerima dakwaan agama Kristian sebagai agama baru yang tidak sah dalam empayar tersebut.

4. Orang Bukan Yahudi Menerima Injil dan Menjadi Umat Allah

Kisah Rasul-Rasul mencerminkan ketegangan yang wujud pada gereja awal tentang hal penghabaran injil kepada dunia orang bukan Yahudi, kemudian tentang tatacara bagaimana mereka diterima masuk ke gereja. Lukas menunjukkan perkembangan injil yang pada mulanya diberitakan hanya kepada orang Yahudi di Yerusalem, dan beberapa tahun kemudian kepada orang-orang Samaria, orang-orang yang tidak bersurat yang takut akan Allah, dan akhirnya kepada orang pagan bukan Yahudi menurut pimpinan dan rancangan Allah. Kejadian-kejadian tersebut terjadi tanpa perancangan dari gereja dan gereja harus menerima kenyataan tentang fakta ini.

Sejajar dengan penerimaan orang-orang bukan Yahudi di gereja, Lukas juga menunjukkan bagaimana semakin ramai orang Yahudi yang menolak injil. Paulus juga selalu digambarkan sebagai memulakan misinya pertama-tama di kalangan orang Yahudi di rumah-rumah ibadat, dan hanya apabila mereka menolak barulah dia datang kepada orang-orang bukan Yahudi.



5. Kejayaan Agama Kristian Meskipun Ditentang

Salah satu tema yang ada terdapat dalam Kisah Rasul-Rasul ialah fakta tentang pengkhabaran injil yang berhadapan dengan banyak tentang. Ia bermula apabila orang Yahudi menolak berita keselamatan dan tidak mahu menerima hakikat bahawa agama Kristian ialah pelengkap kepada agama Yahudi. Mereka juga sangat menentang pemberitaan injil kepada orang-orang bukan Yahudi. Dalam banyak kes, mereka mendapat sokongan dari orang-orang bukan Yahudi untuk bertindak dengan keganasan menentang para penginjil. Walau bagaimanapun, meskipun banyak tentang dan penganiayaan yang dialami oleh para penginjil awal, Firman Allah terus tersebar dengan meluas. Kejayaan gereja untuk membawa injil dari Yerusalem ke Roma dan penanaman gereja tempatan di seluruh empayar Roma membuktikan bahawa agama Kristian bukan hanya sekadar perbuatan manusia. Rancangan Allah pasti akan dipenuhi tanpa mengira apa juga halangan.

Garis Kasar Kisah Rasul-Rasul	
Kisah Rasul-Rasul boleh disusun kepada lapan bahagian utama:	
I Kelahiran Gereja (1:1-2:47)	II. Gereja dan Pihak Berkuasa Yahudi (3:1-5:42)
III Gereja Mula Berkembang (6:1-9:31)	IV Permulaan Misi untuk Orang Bukan Yahudi (9:32-12:25)
V Misi Ke Asia Kecil dan Akibatnya (13:1-15:35)	VI Kempen Misi Paulus di Makedonia dan Akhaya (15:36-18:17)
VII Kempen Misi Paulus di Asia (18:18-20:38)	VIII Paulus Ditangkap dan Dipenjarakan (21:1-28:31)

Tokoh-Tokoh Dalam Kisah Rasul-Rasul

I. Kerabat Diraja Herodes Agung

A. Herodes Agripa I

Dalam sejarah, dia dikenali sebagai Raja Herodes Agripa I dan dalam Perjanjian Baru (Kis 12) sebagai Herodes. Agripa I merupakan putera kepada Aristobulus, abang kepada Herodias dan cucu kepada Raja Herodes Agung. Dia dibesarkan di Roma di bawah perlindungan putera kesayangan Kaisar Tiberius, Drusus. Dia menyebabkan Kaisar Tiberius murka padanya apabila dia pergi ke Roma untuk menuduh bapa saudaranya Antipas lalu dipenjarakan.

Dia memiliki sifat licik dan mempersona kerabat Herodes. Dia dibebaskan apabila Caligula menggantikan Tiberius sebagai kaisar, dan mengambil alih kawasan Iturea dan Trakonitis dari bapa saudaranya (yang baru meninggal dunia) kerana persahabatannya dengan Caligula. Dia juga dinobatkan sebagai 'raja'. Apabila bapa saudaranya Antipas dan Herodias pergi ke Roma untuk menuntut gelaran diraja, dia mengekor mereka dan berjaya menghasut kaisar untuk membuat mereka ke Sepanyol. Kawasan yang dimiliki oleh mereka berdua, Galilea dan Perea, diambil alih oleh Herodes.

Apabila Caligula dibunuh pada 41 M, Agripa kekal dalam perkenaan Raja Claudius, yang memberikan semua kawasan pemerintahan datuknya termasuk Yudea dan Samaria kepada Agripa. Dia semakin berkuasa, ditambah dengan sokongan orang-orang Yahudi. Dia memerintah kawasan gabungan milik datuknya Herodes Agung dari 40 M sehingga kematiannya pada 44 M ketika berumur 54 tahun.

Walaupun dia mendapat kedudukannya dengan bantuan Roma, dia tahu kepentingan untuk membuat hubungan yang baik dengan orang-orang Yahudi. Dia membunuh Yakobus, salah seorang daripada dua belas murid Yesus untuk mengambil hati mereka, memenjarakan Petrus dan merancang untuk mengadakan pengadilan dan hukuman terbuka selepas Paskah (Kis 12:2-4). Kematian Agripa yang mendadak berlaku selepas dia menerima pujian dan memanggil dirinya sebagai tuhan (Kis 12:20-23).